

四庫全書

集部

欽定四庫全書

古詩鏡卷四

明 陸時雍 編

魏第一

建安詩高華勝而沉摯  
稀物色繁而情性寡  
漢人修簪魏氏鋪排  
詩以婉而深婉則多風直則寡致建安多坐此病

武帝

姓曹諱操字孟德沛國譙人漢舉孝廉為郎歷位丞相封魏王後其子丕代漢追諡曰武皇帝廟號

太祖

孟德老而卓語  
多馱辭之氣

樂府

短歌行

對酒當歌人生幾何譬如朝露去日苦多慨當以慷憂  
思難忘何以解憂唯有杜康青青子衿悠悠我心但為  
君故沉吟至今呦呦鹿鳴食野之苹我有嘉賓鼓瑟吹  
笙明明如月何時可掇憂從中來不可斷絕越陌度阡  
枉用相存契闊談讌心念舊恩月明星稀烏鵲南飛繞

樹三匝何枝可依山不厭高海不厭深周公吐哺天下

歸心

聳然高峙絕無緣傍 壯士搔首  
語不入綺羅麗句老氣酷烈撲人

步出東西門行

雲行雨步超越九江之臯臨觀異同心意懷遊豫不  
知當復何從經過至我碣石心惆悵我東海

雲行至  
此為駐

神龜雖壽猶有竟時騰蛇乘霧終為土灰老驥伏櫪志  
在千里烈士暮年壯心不已盈縮之期不但在天養怡

之福可得永年幸甚至哉歌以詠志

右龜雖壽

老驥語無他奇何故千古稱  
賞祇本色披搗不容復過

苦寒行

北上太行山艱哉何巍巍羊腸坂詰屈車輪為之摧樹  
木何蕭瑟北風聲正悲熊羆對我蹲虎豹夾路啼谿谷  
少人民雪落何霏霏延頸長歎息遠行多所懷我心何  
怫鬱思欲一東歸水深橋梁絕中路正徘徊迷惑失故

路薄暮無宿棲行行日已遠人馬同時饑擔囊行取薪  
斧冰持作糜悲彼東山詩悠悠使我哀

却東西門行

鴻鴈出塞北乃在無人鄉舉翅萬里餘行止自成行冬  
節食南稻春日復北翔田中有轉蓬隨風遠飄揚長與  
故根絕萬歲不相當奈何此征夫安得去四方戎馬不  
解鞍鎧甲不離旁冉冉老將至何時反故鄉神龍藏深  
泉猛獸步高岡狐死歸首丘故鄉安可忘

文帝

諱正字子桓太祖長子八歲能屬文建安十六年為五官中郎將二十二年立為魏太子太祖薨嗣

位為丞相魏王稱

受漢禪遂即帝位

子桓優柔和美讀之齒猶餘芬昔人謂其質如美媛信然 子桓詩顧盼生姿

樂府

善哉行

上山採薇薄暮苦饑谿谷多風霜露沾衣

野雉羣雉

猿猴相追還望故鄉鬱何壘壘

二

高山有崖林木有枝

憂來無方人莫之知

三

人生如寄多憂何為今我不樂

歲月如馳四解湯湯川流中有行舟隨波轉薄有似客遊

五解策我良馬被我輕裘載馳驅聊以忘憂六解

悠揚澹蕩似羅綺靡風  
湯湯四語極自在之致

### 燕歌行二首

秋風蕭瑟天氣涼草木搖落露為霜羣燕辭歸鴈南翔  
念君客遊思斷腸慙慙思歸戀故鄉君何淹留寄他方  
賤妾斃斃守空房憂來思君不敢忘不覺淚下沾衣裳  
援琴鳴絃發清商短歌微吟不能長明月皎皎照我牀

星漢西流夜未央  
牽牛織女遙相望  
爾獨何辜限河梁  
別日何易會日難  
山川悠遠路漫漫  
鬱陶思君未敢言  
寄聲浮雲往不還  
涕零雨面毀形顏  
誰能懷憂獨不歎  
展詩清歌聊自寬  
樂往哀來摧心肝  
耿耿伏枕不能眠  
披衣出戶步東西  
悲風清厲秋氣寒  
羅幃徐動經秦軒  
仰戴星月觀雲間  
飛鳥晨鳴聲可憐  
留連顧懷不自存

宛轉摧藏一言一緒居然漢始之音 憂來思君  
不敢忘何言之拳拳仰戴星月觀雲間飛鳥晨鳴  
聲可憐留連顧懷不自  
存不覺形神俱往矣

陌上桑

棄故鄉離室宅遠從軍旅萬里客披荆棘求阡陌側足  
獨窘步路局窄虎豹嗥動雞驚禽失羣鳴相索登南山  
奈何蹈盤石樹木叢生鬱差錯寢蒿草蔭松栢涕泣雨  
面霑枕席伴旅單稍稍日零落惆悵竊自憐相痛惜

鬱屈悲壯有淮

南招隱之餘

秋胡行

朝與佳人期日夕殊不來嘉肴不嘗旨酒停杯寄言飛

鳥告余不能俯折蘭英仰結桂枝佳人不在結之何為  
從爾何所之乃在大海隅靈若道言貽爾明珠企予望  
之步立踟躕佳人<sub>不來</sub>何得斯須

倚徙躊躕有術

風靜女之致

### 大牆上蒿行

陽春無不長成草木羣類隨大風起零落若何翩翩中  
心獨立一何斃四時舍我驅馳今我隱約欲何為人生  
居天壤間忽如飛鳥棲枯枝我今隱約欲何為適君身

體所服何不恣君口腹所嘗冬被貂麕溫暖夏當服綺  
羅輕涼行力自苦我將欲何為不及君少壯之時乘堅  
車策肥馬良上有滄浪之天今我難得久來視下有蠕  
蠕之地今我難得久來履何不恣意遨遊從君所喜帶  
我寶劍今爾何為自低昂悲麗平壯觀白如積雪利如  
秋霜駁犀標首玉琢中央帝王所服辟除凶殃御左右  
奈何致福祥吳之辟閭越之步光楚之龍泉韓有墨陽  
苗山之鋌羊頭之鋼知名前代咸自謂麗且美曾不知

君劔良綺難忘冠青雲之雀鬼織羅為纓飾以翠翰既  
美且輕表容儀俯仰垂光榮宋之章甫齊之高冠亦自  
謂美蓋何足觀排金鋪坐玉堂風塵不起天氣清涼奏  
桓瑟舞趙倡女娥長歌聲協宮商感心動耳蕩氣回腸  
酌桂酒繪鯉魴與佳人期為樂康前奉玉卮為我行觴  
今日樂不可忘樂未央為樂常若遲歲月逝忽若飛何  
為自苦使我心悲

一往生韵  
流注其間

豔歌何嘗行

何嘗快獨無憂但當飲醇酒炙肥牛

解一

長兄為二千石

中兄被貂裘

解二

小弟雖無官爵鞍馬馭馭往來王侯長

者遊

解三

但當在王侯殿上快獨擣菹六博對坐彈棋

解四

男兒居世各當努力躋迫日暮殊不久留

解五

少小相觸

抵寒苦常相隨念志安足諍吾中道與卿共別離約身

奉事君禮節不可虧上慚滄浪之天下顧黃口小兒奈

何復老心皇皇獨悲誰能知

少小下為趨前為豔

酣暢  
跌蕩

詩

於譙作

清夜延貴客明燭發高光  
豐膳漫星陳旨酒盈玉觴  
絃歌奏新曲游響拂丹梁  
餘音赴迅節慷慨時激揚  
獻酬紛交錯雅舞何鏘鏘  
羅纓從風飛長劔自低昂  
穆穆衆君子和合同樂康

芙蓉池作

乘輦夜行遊逍遙步西園雙渠相溉灌嘉木繞通川  
卑枝拂羽蓋修條摩蒼天驚風扶輪轂飛鳥翔我前  
丹霞夾明月華星出雲間上天垂光彩五色一何鮮  
壽命非松喬誰能得神仙遨遊快心意保已終百年

於玄武陂作

兄弟共行遊驅車出西城野田廣開闢川渠互相經  
黍稷何鬱鬱流波激悲聲菱芡覆綠水芙蓉發丹榮  
柳垂重蔭綠向我池邊生乘渚望長洲羣鳥謹譁鳴  
萍藻泛

金少曰古今言  
卷四  
濫浮澹澹隨風傾忘憂共容與暢此千秋情

五言諸作風味氣  
韻貴美殊不可言

雜詩二首

漫漫秋夜長烈烈北風涼  
輾轉不能寐披衣起彷徨  
彷徨  
徬忽已久白露沾我裳  
俯視清水波仰看明月光  
天漢  
回西流三五正縱橫  
草蟲鳴何悲孤鴈獨南翔  
鬱鬱多  
悲思綿綿思故鄉  
願飛安得翼欲濟河無梁  
向風長歎  
息斷絕我中腸

西北有浮雲亭亭如車蓋惜哉時不遇遙與飄風會吹我東南行  
行行至吳會吳會非我鄉安得久留滯棄置勿復陳客子常畏人

此詩境不必異語不必奇獨以其氣韻  
綿綿神情眇眇一歎一咏大足會心耳

### 於盟津作

遙遙山上亭皎皎雲間星遠望使心懷遊子戀所生驅  
車出北門遙望河陽城凱風吹長棘天天枝葉傾黃鳥  
飛相追咬咬弄音聲竝立望西河泣下沾羅纓

遙遙山上亭皎皎雲間星遠望使心懷遊子戀所  
生隨境自成不煩專設凱風吹長棘天天枝葉傾

黃鳥飛相迫咬咬弄音聲竚立望西河泣下沾羅  
纓此其托物淺而寄情深矣漢魏詩無佳句以  
所佳不在句也丹霞夾明月華星出雲間乘渚望  
長洲羣鳥譟譟鳴萍藻汎濫浮澹澹隨風傾此其  
旨超平鋪散綴無處不佳亦無處見佳耳後人却  
撮入一語一字見奇又以虛摹巧繪逼其意象便  
拙

見挽船士兄弟辭別詩

舍我故鄉客將適萬里道妻子牽衣袂落淚霑懷抱

甄皇后

樂府

# 塘上行

鄴都故事云魏文帝甄皇后袁紹中子熙之妻也  
太祖破紹文帝時為太子遂納為夫人生明帝後  
為郭后所譖賜死後宮臨終為詩今詳其詞氣蓋  
初見棄在後宮所作非臨終時語也樂府解題曰  
前志云晉樂奏魏武帝蒲生篇而諸集錄皆言其  
詞文帝甄后所作歎以讒訴見棄猶幸得新好不  
遺故

惡馬

蒲生我池中其葉何離離  
傍能行仁義莫若妾自知  
衆口鑠黃金使君生別離  
念君去我時獨愁常苦悲  
想見君顏色感結傷心脾  
念君常苦悲夜夜不能寐  
莫以豪

賢故棄捐素所愛莫以魚肉賤棄捐葱與薤莫以麻泉  
賤棄捐管與蒯出亦復苦愁入亦復苦愁邊地多悲風  
樹木何脩脩從軍致獨樂延年壽千秋

質樸少韻其意  
固佳病太直耳

古詩鏡卷四

欽定四庫全書

古詩鏡卷五

明陸時雍編

魏第二

陳思王植

字子建太祖子文帝同母弟也建安十六年封平原侯尋徙封臨淄文帝即位命諸侯並

就國黃初二年貶安鄉侯改封鄆城二年立為鄆城王四年徙封雍丘明帝太和元年改封浚儀三年復還雍丘四年徙東阿六年加封陳王薨年四十一謚曰思

子建才氣高亮動有琳瑯聲恣意揮霍無所不可子建才高每恃才為累其佳處在興言成篇病

處在率

意取足

詩

上責躬詩

魏志曰黃初四年植朝  
京都上疏并獻詩一首

於穆顯考時惟武皇受命於天寧濟四方朱旗所拂九  
土披攘玄化滂流荒服來王超商越周與唐比蹤篤生  
我皇奕世載聰武則肅烈文則時雍受禪于漢君臨萬  
邦萬邦既化率由舊則廣命懿親以藩王國帝曰爾侯

君茲青土奄有海濱方周于魯車服有輝旗章有敘濟  
濟雋乂我弼我輔伊予小子恃寵驕盈舉挂時網動亂  
國經作藩作屏先軌是隳傲我皇使我朝儀國有典  
刑我削我黜將寘于理元兇是率明明天子時惟篤類  
不忍我刑暴之朝肆違彼執憲哀予小子改封衮邑于  
河之濱股肱弗置有君無臣荒淫之闕誰弼予身斃斃  
僕夫于彼冀方嗟予小子乃罹斯殃赫赫天子恩不遺  
物冠我玄冕要我朱紱光光大使我榮我華剖符授土

王爵是加仰齒金匱俯執聖策皇恩過隆祇承怵惕咨  
我小子頑兇是嬰逝慙陵墓存愧闕庭匪敢傲德實恩  
是恃威靈改加足以沒齒昊天罔極生命不圖常懼顛  
沛抱罪黃墟願蒙矢石建旗東嶽庶立毫釐微功自贖  
危軀授命知足免戾甘赴江湘奮戈吳越天啓其衷得  
會京畿遲奉聖顏如渴如饑心之云慕愴矣其悲天高  
聽早皇肯照微

子建四言不及王祭甚遠責躬應詔  
是駢麗語所可喜者是其便便屬足

朔風詩 五章

仰彼朔風用懷魏都願騁代馬倏忽北徂凱風永至思  
彼蠻方願隨越鳥翻飛南翔

四氣代謝懸景運周別如俯仰脫若三秋昔我初遷朱  
華未晞今我旋止素雪云飛

俯降千仞仰登天阻風飄蓬飛載離寒暑千仞易陟天  
阻可越昔我同袍今永乖別

子好芳草豈忘爾貽繁華將茂秋霜悴之君不垂眷豈

云其誠秋蘭可喻桂樹冬榮

絃歌蕩思誰與銷憂臨川慕思何為泛舟豈無和樂遊

非我隣誰忘泛舟愧無榜

音人

婉致多風雅  
得風人遺教

附矯志詩巧言如屑 芝桂雖芳難以餌烹尸位素  
餐難以成名磁石引鐵於全不連大朝舉士愚不聞  
馬抱壁塗乞無為貴寶履仁遺禍無為貴道駕維遠  
害不羞卑棲靈虬避難不耻汚泥都蔗雖甘杖之必  
折巧言雖美用之必滅濟濟唐朝萬邦作孚逢蒙雖  
巧必得良弓聖主雖知必得英雄螳螂見歎齊士輕  
戰越王執蛙國以死獻道遠知驥世偽知賢覆之情  
之順天之矩澤如凱風惠如時雨口為禁聞舌為發

機門機之闈  
樞夫不追

### 樂府

#### 君子行

君子防未然不處嫌疑間  
瓜田不納履李下不正冠  
嫂叔不親授長幼不比肩  
勞謙得其柄和光甚獨難  
周公下白屋吐哺不及餐  
一沐三握髮後世稱聖賢

風骨稜厲斷非漢語其為子建作無疑也  
瓜田不納履李下不正冠此閱世名語

#### 吁嗟篇

樂府解題曰曹植擬苦寒行為吁嗟魏志曰植每欲求別見獨談及時政幸冀試用終不能得時法制待藩國峻迫植十一年而三徙都常汲汲無歡

吁嗟此轉蓬居世何獨然長土本根逝宿夜無休閒東  
西經七陌南北越九阡卒遇回風起吹我入雲間自謂  
終天路忽然下沈泉驚飈接我出故歸彼中田當南而  
更北謂東而反西宕宕當何依忽亡而復存飄颻周八  
澤連翩歷五山流轉無恒處誰知吾苦艱願為中林草  
秋隨野火燔靡滅豈不痛願與根芟連

中多蕪穢不治後云願為中林草秋隨野火燔糜  
減豈不痛願與根荄連斯言痛衷殊甚子桓取  
譬浮雲子建取譬轉蓬皆無聊語意要皆托意  
既淺作用亦自不深如闕畦鵲巢何其深厚

### 蒲生行浮萍篇

浮萍寄清水隨風東西流結髮辭嚴親來為君子仇恪  
勤在朝夕無端獲罪尤在昔蒙恩惠和樂如瑟琴何意  
今摧頽曠若商與參茱萸自有芳不若桂與蘭新人雖  
可愛無若故所懽行雲有反期君恩儻中還慊慊仰天  
歎愁心將何愬日月不恒處人生忽若寓悲風來入懷

淚下如垂露發篋造裳衣裁縫紈與素

塘上行質直簡厚蒲生行犀利風華菜莢自有芳  
不若桂與蘭新人雖可愛無若故所懼英英與致  
悲風來入懷淚下如垂露發篋造裳衣裁縫紈與  
素其言恫有餘情 每讀子建詩覺高華之氣溢

人襟帶

篋篋引

置酒高殿上親友從我遊中厨辦豐膳烹羊宰肥牛秦  
箏何慷慨齊瑟和且柔陽阿奏竒舞京洛出名謳樂飲  
過三爵緩帶頰庶羞主稱千金壽賓奉萬年酬久要不

可忘薄終義所尤謙謙君子德磬折欲何求驚風飄白日  
光景馳西流盛時不可再百年忽我道生存華屋處  
零落歸山丘先民誰不死知命復何憂

溫其如玉大雅之音生存華屋處零落歸山丘  
先民誰不死知命復何憂斯言如醇醪之醉

### 野田黃雀行

高樹多悲風海水揚其波利劍不在掌結友何須多不  
見籬間雀見鷓自投羅羅家得雀喜少年見雀悲拔劍  
捎羅網黃雀得飛飛飛摩蒼天來下謝少年

首四句意氣

勃率道上

泰山梁甫行

八方各異氣千里殊風雨劇哉邊海民寄身於草墅妻  
子象禽獸行止依林阻柴門何蕭條狐兔翔我宇

末二句語

氣聳峙

怨歌行

為君既不易為臣良獨難忠信事不顯乃有音見疑患

周公佐成王金縢功不刊推心輔王室二叔反流言待

罪居東國泣涕常流連皇靈大動變震雷風且寒拔樹  
偃秋稼天威不可干素服開金滕感悟求其端公旦事  
既顯成王乃哀歎吾欲竟此曲此曲悲且長今日樂相  
樂別後莫相忘

叙古如披已懷讀之覺一往之氣可尚待罪居東  
國泣涕常流連出意太率聖人情事不若是之惶  
也

### 孟冬篇

孟冬十月陰氣厲清武官誠田講旅統兵元龜襲吉

元光著明虫尤蹕路風弭雨停乘輿啓行鸞鳴幽軋虎賁  
采騎飛象珥鶡鐘鼓鏗簫管嘈喝萬騎齊鑣千乘等  
蓋夷山填谷平林滌藪張羅萬里盡其飛走趨趨狡兔  
揚白跳翰獵以青駁掩以修竿韓盧宋鵠呈才騁足噬  
不盡緹牽麋倚鹿魏氏發機養基撫弦都盧尋高搜索  
猴猿慶忌孟賁蹈谷超壘張目決眚髮怒穿冠頓熊扼  
虎蹴豹搏貙氣有餘勢負象而趨獲車既盈日側樂終  
罷役解徒大饗離宮亂曰聖皇臨飛軒論功校獵徒死

禽積如京流血成溝渠明詔大勞賜大官供有無走馬  
行酒醴驅車布肉魚鳴鼓舉觴爵擊鐘醕無餘絕網縱  
麟麇弛罩出鳳雛功在羽校威靈振鬼區陛下長懽  
樂永世合天符

語少

着色

名都篇

名都多妖女京洛出少年寶劍直千金被服麗且鮮闔  
雞東郊道走馬長楸間馳騁未能半雙兔過我前攬弓

捷鳴鏑長驅上南山左挽因右發一縱兩禽連餘巧未  
及展仰手接飛鳶觀者咸稱善衆工歸我妍歸來宴平  
樂美酒斗十千膾鯉膾胎鰕炮鼈炙熊蹯鳴儔嘯匹侶  
列坐竟長筵連翩擊鞠壤巧捷惟萬端白日西南馳光  
景不可攀雲散還城邑清晨復來還

闕雞東郊道走馬長楸間馳騁未及半雙兔過我  
前攬弓捷鳴鏑長驅上南山左挽因右發一縱兩  
禽連餘巧未及展仰手接飛鳶觀者咸稱善衆工  
歸我妍數語間節奏未佳便覺情事未果剛是雙  
兔過前攬弓發鏑忽而更連兩禽兩禽既連  
忽而接及飛鳶耶第來之滔滔吾取其裕

美女篇

美女妖且閒採桑歧路間柔條紛冉冉落葉何翩翩攘  
袖見素手皓腕約金環頭上金爵釵腰佩翠琅玕明珠  
交玉體珊瑚間木難羅衣何飄飄輕裾隨風還顧盼遺  
光彩長嘯氣若蘭行徒用息駕休者以忘餐借問女安  
居乃在城南端青樓臨大路高門結重關容華耀朝日  
誰不希令顏媒氏何所營玉帛不時安佳人慕高義求  
賢良獨難衆人徒嗷嗷安知彼所觀盛年處房室中夜

起長歎

詩道精微不徒形似美女篇  
之所美者皆在形骸之外

白馬篇

白馬飾金羈連翩西北馳借問誰家子幽并遊俠兒少  
小去鄉邑揚聲沙漠陞宿昔秉良弓楛矢何參差控弦  
破左的右發摧月支仰手接飛猱俯身散馬蹄狡捷過  
猴猿勇剽若豹螭邊城多警急胡虜數遷移羽檄從北  
來厲馬登高隄長驅蹈匈奴左顧陵鮮卑棄身鋒刃端

性命安可懷父母且不顧何言子與妻名編壯士籍不  
得中顧私捐軀赴國難視死忽如歸

亦似哄然雜出仰手接飛猱俯身散馬蹄此二佳  
句大都子建樂府豐贍有餘精彩不足如陳羹  
宿飯咄嗟立辨求其新味無有耳聞雞篇長鳴入  
青雲鼓翅獨翱翔世安得此青雲雞耶詩道精  
微迥然獨舉欲清而遠欲簡而盡欲玄而湛欲微  
而著欲離形而得神欲舉趣而要會若一如賦體  
一如文論便與此道有妨矣  
意此言可以藥建安之病

### 棄婦篇

石榴植前庭綠葉搖縹青丹華灼烈烈璀璨彩有光榮光

榮華流離可以處淑靈有鳥飛來集拊翼以悲鳴悲鳴  
夫何為丹華實不成拊心長歎息無子當歸寧有子月  
經天無子若流星天月相終始流星沒無精棲遲失所  
宜下與瓦石并憂懷從中來歎息通雞鳴反側不能寐  
逍遙於前庭踟躕還入房肅肅帷幕聲寥惟更搨帶撫  
弦彈鳴箏慷慨有餘音要妙悲且清收淚長歎息何以  
負神靈招搖待霜露何必春夏成晚穫為良實願君且  
安寧

有子月經天無子若流  
星知古人勸語之難

妾薄命

日月既逝西藏更會蘭室洞房華燈步障舒光皎若日  
出扶桑促樽合坐行觴主人起舞溢盤能者穴觸別端  
騰觚飛爵闌干同量等色齊顏任意交屬所歡朱顏發  
外形蘭袖隨禮容極情妙舞僊僊體輕裳解履遺絕纓  
俛仰笑喧無呈覽持佳人玉顏齊舉金爵翠盤手形羅  
袖良難腕弱不勝珠環坐者歎息舒顏御中裛粉君傍

中有霍納都梁雞舌五味雜香進者何人齊姜恩重愛  
深難忘召延親好宴私但歌杯來何遲客賦既醉言歸  
主人稱露未晞

體物入微朱顏發外形蘭世無朱蘭意者言其嬌  
態耶同量等色齊顏任意交屬所歡裳解履遺絕  
纓佻仰笑宣無呈神趣  
畢著彷彿招魂體物

當來日大難

日短短樂有餘乃置玉樽辦東厨廣情故心相於闔門  
置酒和樂欣欣遊馬後來轅車解輪今日同堂出門異

鄉別易會難各盡杯觴

當墻欲高行

龍欲升天須浮雲人之仕進待中人衆口可以鑠金讒  
言三至慈母不親憤憤俗間不辨偽真願欲披心自說  
陳君門以九重道遠河無津

落落數語格致標舉情事渾合  
是剪水縫雲手更快真不可當

詩

公宴詩

金匱要略卷五  
公子敬愛客終宴不知疲清夜遊西園飛蓋相追隨  
明月澄清影列宿正參差秋蘭被長坂朱華冒綠池潛魚  
躍清波好鳥鳴高枝神飈接丹轂輕輦隨風移飄飆放  
志意千秋長若斯

贈徐幹

驚風飄白日忽然歸西山圓景光未滿衆星燦以繁志  
士營世業小人亦不閒聊且夜行游游彼雙闕間文昌  
鬱雲興迎風高中天春鳩鳴飛棟流焱激樞軒顧念蓬

室士貧賤誠足憐薇藿弗充虛皮褐猶不全慷慨有悲  
心興文自成篇寶棄怨何人和氏有其愆彈冠俟知己  
知己誰不然良田無晚歲膏澤多豐年亮懷璫璣美積  
久德愈宣親交義在敦申章復何言

### 贈丁儀

魏畧曰丁儀字正  
禮太祖辟為掾

初秋涼氣發亭樹微銷落凝霜依玉除清風飄飛閣朝  
雲不歸山霖雨成川澤黍稷委疇隴農夫安所獲在貴

多忘賤為恩誰能博孤白足禦冬馬念無衣客思慕  
延陵子寶劍非所惜子其寧爾心親交義不薄

贈王粲

端坐苦愁思攬衣起西遊樹木發春華清池激長流中  
有孤鴛鴦哀鳴求匹儔我願執此鳥惜哉無輕舟欲歸  
忘故道顧望但懷愁悲風鳴我側義和逝不留重陰潤  
萬物何懼澤不周誰令君多念自使懷百憂

贈徐幹丁儀王粲諸詩興言成詠病一往意盡苦  
無餘情贈王粲詩中有孤鴛鴦哀鳴求匹儔我願

孰此烏惜哉無輕舟此中  
正好致款却又率然過去

贈白馬王彪 七章

序曰黃初四年正月白馬王任城王與余俱朝京師  
會節氣到洛陽任城王薨至七月與白馬王還  
國後有司以二王歸蕃道路宜異宿止意毒恨  
之蓋以大別在數日是用自剖與王辭焉憤而  
成篇

謁帝承明廬逝將歸舊疆清晨發皇邑日夕過首陽伊

洛廣且深欲濟川無梁汎舟越洪濤怨彼東路長顧瞻  
戀城闕引領情內傷

太谷何寥廓山樹鬱蒼蒼霖雨汎我塗流潦浩縱橫中  
逵絕無軌改轍登高岡修坂造雲日我馬玄以黃

玄黃猶能進我思鬱以紆鬱紆將何念親愛在離居本  
圖相與偕中更不克俱鳩臯鳴衡軼豺狼當路衢蒼蠅  
間白黑讒巧令親疎欲還絕無蹊攬轡止踟蹰

踟蹰亦何留相思無終極秋風發微涼寒蟬鳴我側原

野何蕭條白日忽西匿歸鳥赴喬林翩翩厲羽翼孤獸  
走索羣銜草不遑食感物傷我懷撫心長太息

太息將何為天命與我違奈何念同生一往形不歸孤  
魂翔故域靈柩寄京師存者忽已過亡沒身自衰人生  
處一世去若朝露晞年在桑榆間影響不能追自顧非

金石咄嗟令心悲

存者亡沒  
當是錯互

心悲動我神棄置莫復陳丈夫志四海萬里猶比隣思  
愛苟不虧在遠分日親何必同衾悵然後展殷勤憂思

成疾瘵無乃兒女仁倉卒骨肉情能不懷苦辛

苦辛何慮思天命信可疑虛無求列仙松子久吾欺變  
故在斯須百年誰能持離別永無會執手將何時王其  
愛玉體俱享黃髮期收淚即長路援筆從此辭

憂虞之感離別之情見之骨肉此中最多隱衷悅  
緒今讀其詩猶覺慷慨之氣勝於綢繆披衷展  
襟一豁所意不假絲毫緣  
飾而成謂之宗匠以此

送應氏詩

清時難屢得嘉會不可常天地無終極人命若朝霜願

得展嫵婉我友之朔方親昵並集送置酒此河陽中饋  
豈獨薄賓飲不盡觴愛至望苦深豈不愧中腸山川阻  
且遠別促會日長願為比翼鳥施翮起高翔

三良詩

功名不可為忠義我所安秦穆先下世三臣皆自殘生  
時等榮樂既沒同憂患誰言捐軀易殺身誠獨難攬涕  
登君墓臨穴仰天歎長夜何冥冥一往不復還黃鳥為  
悲鳴哀哉傷肺肝

功名不可為忠義我所安秦穆先下世三臣皆自  
殘生時等榮樂既沒同憂患言三良合得此死誰  
言捐軀易殺身誠獨難攬涕登君墓臨穴仰天歎  
長夜何冥冥一往不復還黃鳥為悲鳴哀哉傷肺  
肝又歎三良之為此死大匠  
運斤不覩其迹如此簡至

雜詩

高臺多悲風朝日照北林之子在萬里江湖迴且深方  
舟安可極離思故難任孤鴈飛南遊過庭長哀吟翹思  
慕遠人願欲托遺音形影忽不見翩翩傷我心

轉蓬離本根飄颻隨長風何意迴飈舉吹我入雲中高

高上無極天路安可窮類此流宕子捐軀遠從戎毛褐  
不掩形薇藿常不充去去莫復道沈憂令人老

西北有織婦綺縞何繽紛明晨秉機杼日昃不成文太  
息終長夜悲嘯入青雲妾身守空閨良人行從軍自期  
三年歸今已歷九春孤鳥遶樹翔嗷嗷鳴索羣願為南  
流景馳光見我君

南國有佳人容華若桃李朝遊江北岸夕宿瀟湘汜時  
俗薄朱顏誰為發皓齒俛仰歲將暮榮耀難久恃

高臺多悲風朝日照北林之子在萬里江湖迴且  
深意况迴出見其有披襟八荒揮手雲漢氣象時  
俗薄朱顏誰為發皓齒俛仰歲  
將暮榮華難久恃是瓊樓人語

七哀詩

謂痛而哀義而哀感而哀怨而哀耳  
目聞見而哀口欲而哀鼻酸而哀

明月照高樓流光正徘徊上有愁思婦悲歎有餘哀借  
問歎者誰言是宕子妻君行踰十年孤妾常獨棲君若  
清路塵妾若濁水泥浮沉各異勢會合何時諧願為西  
南風長逝入君懷君懷良不開賤妾當何依

造情取境古人所難此是詩家第一義觀子建王  
粲七哀雜詩等篇知古人端不妄作七哀語致

高雅使齊梁人為之不知幾許  
涕淚妖啼鬼哭窮極惡態矣

附 鮠 鮠 篇 鮠 鮠 游 潢 潦 不 知 江 海 流 燕 雀 戲 蕩 柴  
安 識 鴻 鵠 遊 世 士 比 誠 明 大 德 因 無 俦 駕 言 登 五 嶽  
然 後 小 陵 丘 俯 觀 世 上 人 勢 利 惟 是 謀 讐 高 念 皇 家  
遠 懷 柔 九 州 撫 劍 而 雷 音 猛 氣 縱 橫 浮 汎 泊 徒 嗷 嗷  
誰 知 壯 士 憂

附 怨 詩 行 此 詩 不 若 本 調 之 佳 君 若 清 路 塵 妾 若  
濁 水 况 浮 沉 各 異 勢 會 合 何 時 諧 語 何 不 佳 北 風 行  
蕭 蕭 烈 烈 入 吾 耳 心 中 念 故 人 淚 墮 不 能 止 語 非 不  
佳 入 此 似 不 合 調 末 云 思 情 中 道 絕 流 止 任 東 西 語  
格 更 晚 明 月 照 高 樓 流 光 正 排 徊 上 有 愁 思 婦 悲  
歎 有 餘 哀 借 問 歎 者 誰 自 云 宕 子 妻 夫 行 踰 十 載  
賤 妾 常 獨 棲 念 君 過 於 渴 思 君 劇 於 饑 君 作 高 山  
栢 妾 為 濁 水 况 北 風 行 蕭 蕭 烈 烈 入 吾 耳 心 中 念

故人淚墮不能止  
浮沉各異路會合當何諧  
願作東北風吹我入君懷  
君懷常不閒賤妾當何依  
思情中道絕流止任東西  
我欲竟此曲此曲悲且長  
今日樂相樂別後莫相忘



古詩鏡卷五

欽定四庫全書

集部

古詩鏡卷六

六至

詳校官庶吉士 臣 范逢恩

主事銜 臣 徐以坤 覆勘

總校官編修 臣 王燕緒

校對官中書 臣 陳 墉

謄錄監生 臣 陳廷桂

欽定四庫全書

古詩鏡卷六

明陸時雍編

魏第三

王粲

字仲宣山陽高平人有異才漢獻帝西遷因徙居長安後之荆州依劉表表卒曹操辟為丞相掾賜

爵關内侯拜侍中

建安二十二年卒

仲宣詩近于桓稍帶綺麗四言長

於言慚溫厚典則深得小雅遺教

詩

贈蔡子篤詩

蔡睦字子篤為尚書仲宣與之同  
避難荆州子篤還仲宣作此贈之

翼翼飛鸞載飛載東我友云徂言戾舊邦舫舟翩翩以  
汴大江蔚矣荒塗時行靡通慨我懷慕君子所同悠悠  
世路亂離多阻濟岱江行邈焉異處風流雲散一別如  
雨人生實難願其弗與瞻望遐路允企伊佇烈烈冬日肅  
肅淒風潛鱗在淵歸鴈載軒苟非鴻鵬孰能飛翻雖則  
追慕子思罔宣瞻望東路慘愴增歎率彼江流爰逝靡

期君子信誓不遷于時及子同寮生死固之何以贈行  
言授斯詩中心孔悼涕淚漣洏嗟爾君子如何勿思

### 贈士孫文始

三輔決錄注曰士孫萌字文始少有才學年十五能屬文初董卓之誅也萌父瑞知王允必敗京師不可居乃命萌將家屬至荊州依劉表去無幾果為李傕等所殺及天子都許昌追論誅董卓之功封萌為澹津亭侯與山陽王粲

善萌當就國祭作詩以贈萌

天降喪亂靡國不夷我暨我友自彼京師宗守盪失越  
用遁違遷于荆楚在漳之湄在漳之湄亦克晏處和通

荒墳比德車輔既度禮義卒獲笑語庶茲永日無訾厥  
緒雖曰無訾時不我與同心離事乃有逝止橫此大江  
淹彼南汜我思弗及載坐載起惟彼南汜君子居之悠  
悠我心薄言慕之人亦有言靡日不思矧伊嫵婉胡不  
悽而晨風夕逝託與之期瞻仰王室慨其永歎良人在  
外誰佐天官四國方阻俾爾歸藩爾之歸藩作式下國  
無曰蠻裔不虔汝德慎爾所主率由嘉則龍雖勿用志  
亦靡忒悠悠澹澹鬱彼唐林雖則同域邈其迴深白駒

遠志古人所箴允矣君子不遐厥心既往既來無密爾

音

贈蔡子篤士孫文始其言穆如清風和氣襲人衷懷欲罄能令聞者一起再舞

### 贈文叔良

搜神記曰文穎字叔良南陽人為荊州從事

翩翩者鴻率彼江濱君子于征爰聘西隣臨此洪渚伊思梁岷爾行孔邈如何勿勤君子敬始慎爾所主謀言必賢錯說申輔延陵有作僑矜是與先民遺跡來世之

矩既慎爾主亦迪知幾探情以華覩著知微視明聰聰  
靡事不惟董褐荷名胡寧不師衆不可蓋無尚我言梧  
宮致辯齊楚構患成功有要在衆思歡人之多忌掩之  
實難瞻彼黑水滔滔其流江漢有卷允來厥休二邦若  
否職汝之由緬彼行人鮮克弗留尚哉君子異于他仇  
人惟不勤無厚我憂惟思作贈敢詠在舟

思親詩

為潘文  
則作

穆穆顯妣德音徽止思齊先姑志侔姜似躬此勞瘁鞠

予小子小子之生遭世罔寧烈考勤時從之于征奄遭  
不造殷憂是嬰咨于靡及退守祧祊五服荒離四國分  
爭禍難斯逼救死於頸嗟我懷歸弗克弗逞聖善獨勞  
莫慰其情春秋代逝于茲九齡緬彼行路馬託子誠子  
誠既否委之于天庶我顯妣克保遐年疊疊惟懼心乎  
如懸如何不弔早世徂顛於存弗養於沒弗臨遺愆在  
體慘痛切心形影尸立魂爽飛沈在昔蓼莪哀有餘音  
我之此譬憂其獨深胡寧視息以濟于今巖巖叢險則

金史曰人合三  
卷六  
不可摧仰瞻歸雲俯聆颺回飛馬靡翼超焉靡階思若  
流波清似坻頽詩之作矣情以告哀

公讌詩

昊天降豐澤百卉挺葳蕤涼風撤蒸暑清雲却炎暉高  
會君子堂竝坐蔭華棖嘉肴充圓方旨酒盈金壘管絃  
發徽音曲度清且悲合坐同所樂但想栝行遲常聞詩  
人語不醉且無歸今日不極歡含情欲待誰見眷良不  
翅守分豈能違古人有遺言君子福所綏願我賢主人

與天享巍巍克符周公業奕世不可追

有懷如醴  
温温欲罄

詠史詩

自古無殉死達人所共知秦穆殺三良惜哉空爾為結  
髮事明君受恩良不訾臨沒要之死焉得不相隨妻子  
當門泣兄弟哭路陞臨穴呼蒼天涕下如綆縻人生各  
有志終不為此移同知埋身劇心亦有所施生為百夫  
雄死為壯士規黃鳥作哀詩至今聲不虧

既責穆公復美三良然何至作津津語豈將為疑塚之陪隸耶君子生為世益死為世重寧以妾僕自效仲宣欲以自見乃以自卑百世以下窺其隱矣晏嬰不死崔氏之難君子不以為非况殉葬耶三良或未嘗一請於襄公襄公或拒三良之請足皆不可知者此柳宗元所以討彼狂也子建功名不可為忠義我所安正欲其死所而不得

雜詩

日暮遊西園寫我憂思情曲池揚素波列樹敷丹榮上有特棲鳥懷春向我鳴褰衽欲從之路險不得征徘徊不能去佇立望爾形風颭揚塵起白日忽已冥回身入

空房託夢通精誠人欲天不違何懼不合并

子建雜詩我欲執此鳥惜哉無方舟其  
情亦第已耳王粲春然一往傾倒殆盡

七哀詩

西京亂無象豺虎方遘患復棄中國去委身適荆蠻親  
戚對我悲朋友相追攀出門無所見白骨蔽平原路有  
饑婦人抱子棄草間顧聞號泣聲揮涕獨不還未知身  
死處何能兩相完驅馬棄之去不忍聽此言南登霸陵  
岸回首望長安悟彼下泉人喟然傷心肝

第一首載事陳情登歌入雅千載以下想見其言之切而事之悲者第二首綺靡繁縟隱聞晉漸荆蠻非我鄉何為久滯淫方舟沂大江日暮愁我心山岡有餘映巖阿增重陰依狸馳赴穴飛鳥翔故林流波激清響猴猿臨岸吟迅風拂裳袂白露沾衣襟獨夜不能寐攝衣起撫琴絲桐感人情為我發悲音羈旅無終極憂思壯難任

附從軍詩俛首依人不覺詞色俱隕烈士風當不如是余嘗謂相如封禪頌都是無是公語長於貢諛王粲從軍詩喋喋作阿附言幾於獻諛子建高華子桓和厚二者未知誰勝王粲文深溫其如玉世云曹劉吾未之敢信

劉楨

字公幹東平人太祖辟為丞相掾屬太子嘗宴諸文學酒酣命夫人甄氏出拜坐中咸伏楨獨平視

太祖聞之乃收治舉減死輸  
作署吏建安二十二年卒

劉楨骨幹自饒風華殊乏蘇子瞻謂  
曹劉挺勁須知詩之所貴不專挺勁

詩

公讌詩

永日行遊戲歡樂猶未央  
遺思在玄夜相與復翱翔  
輦車飛素蓋從者盈路傍  
月出照園中珍木鬱蒼蒼  
清川過石渠流波為魚防  
芙蓉散其華菡萏溢金塘  
靈鳥宿水裔仁獸遊飛梁  
華館寄流波豁達來風涼  
生平未始

聞歌之安能詳投翰長歎息綺麗不可忘

清勁

贈五官中郎將四首

昔我從元后整駕至南鄉過彼豐沛都與君共翔翔四  
節相推斥季冬風且涼衆賓會廣坐明鐙熔炎光清歌  
製妙聲萬舞在中堂金壘含甘醴羽觴行無方長夜忘  
歸來聊且為太康四牡向路馳歡悅誠未央

余嬰沈痼疾竄身清漳濱自夏涉玄冬彌曠十餘旬常

恐游岱宗不復見故人所親一何篤步趾慰我身清談  
同日夕情盼叙憂勤便復為別辭遊車歸西鄰素葉隨  
風起廣路揚埃塵逝者如流水哀此遂離分追問何時  
會要我以陽春望慕結不解貽爾新詩文勉哉修令德  
北面自寵珍

秋日多悲懷感慨以長歎終夜不遑寐叙意於濡翰明  
燈曜閨中清風淒已寒白露塗前庭應門重其闕四節  
相推斥歲月忽欲殫壯士遠出征戎事將獨難涕泣灑

衣裳能不懷所歡

涼風吹沙礫霜氣何皚皚

五來切

明月照緹幕華燈散炎

輝賦詩連篇章極夜不知歸君侯多壯思文雅縱橫飛

小臣信頑鹵儻安能追

質直

詳瞻

贈徐幹

誰謂相去遠隔此西掖垣拘限清切禁中情無由宣思  
子沈心曲長歎不能言起坐失次第一日三四遷步出

北寺門遙望西苑園細柳夾道生方塘含清源輕葉隨  
風轉飛鳥何翻翻乖人易感動涕下與衿連仰視白日  
光皦皦高且懸魚燭八紘內物類無頗偏我獨抱深感  
不得與比焉

披衷如火不  
以點綴為工

雜詩

職事相填委文墨紛消散馳翰未暇食日昃不知晏沈  
迷簿領書回回自昏亂釋此出西城登高且遊觀方塘

含白水中有鳧與鴈安得肅肅羽從爾浮波澗

附贈從弟三首 汎汎東流水磷磷水中石蘋藻生  
其涯華葉紛擾溺采之薦宗廟可以羞嘉客宜無園  
中葵懿此出深澤 亭亭山上松瑟瑟谷中風風聲  
一何盛松枝一何勁冰霜正慘悽終歲常端正豈不  
雁凝寒松栢有本性 鳳凰集南嶽徘徊孤竹根於  
心有不厭奮翅凌紫氣豈不常勤苦羞與黃雀羣何  
時當來儀將須聖明君  
巉削峻嶒似少詩人之度

應瑒

字德璉汝南人漢泰山太守劭之從子也魏太祖  
辟為丞相掾屬轉平原侯庶子後為五官中郎將

文學建安二  
十二年卒

詩

侍五官中郎將建章臺集詩

朝鴈鳴雲中音響一何哀  
問子遊何鄉戢翼正徘徊  
言我塞門來將就衡陽樓  
往春翔北土今冬客南淮  
遠行蒙霜雪毛羽日摧頹  
常恐傷肌骨身隕沈黃泥  
簡珠墮沙石何能中自諧  
欲因雲雨會濯翼陵高梯  
良遇不可值伸眉路何階  
公子敬愛客樂飲不知疲  
和顏既已暢乃肯顧細微  
贈詩見存慰小子非所宜  
且為極懽情不醉其無歸  
凡百敬爾位以副饑渴懷

似語不屬聲建  
安中無可置此

應璩

字休璉瑒之弟博學好屬文明帝時歷官散騎常侍齊王即位稍遷侍中大將軍長史曹典多違法

度璩為詩以詛焉其言雖頗諂然多切時要後為侍中典著作嘉平四年卒

詩

百一詩

下流不可處君子慎厥初名高不宿著易用受侵誣前者隳官去有人適我問田家無所有酌醴焚枯魚問我何功德三人承明廬所占於此土是謂仁智居文章不

經國筐篋無尺書用等稱才學往往見歎譽避席跪自  
陳賤子實空虛宋人遇周容慙愧靡所如

丹陽集曰楚國先賢傳言應璩作百一詩譏切時事  
徧以示在事者皆怪愕以為應焚棄之及觀文選所  
載璩百一篇畧不及時事又郭茂倩雜體詩載百一  
詩五篇皆璩所作首篇言馬子侯解音律而以陌上  
桑為風將離二篇傷鬻桑二老無以葬妻子而已無  
宣孟之德可以矐其急三篇言老人自知桑榆之景  
斗酒自勞不肯為子孫積財末篇即文選所載是也  
第四篇似有風諫所謂苟欲娛耳目快心樂腹腸我  
躬不悅歡安能慮死亡此豈非所謂應焚棄之詩乎  
是時曹與事多違法璩為與長史切諫其失如此所  
謂百一者庶幾百  
分有一補於與也

聲格  
顏下

陳琳

字孔璋廣陵人避難冀州末紹使典文章袁氏敗後歸太祖太祖使琳與阮瑀竝為司空軍謀祭酒

管記室軍國書檄多琳  
瑀所作也徒門下省

樂府

飲馬長城窟行

飲馬長城窟水寒傷馬骨往謂長城吏慎莫稽留太原  
卒官作自有程舉築詣汝聲男兒寧當格鬪死何能怫  
鬱築長城長城何連連連連三千里邊城多健兒內舍

多寡婦作書與內舍便嫁莫留住善侍新姑嫜時時念  
我故夫子報書往邊地君今出語一何鄙身在旣難中  
何為稽留他家子生男慎莫舉生女哺用脯君獨不見  
長城下死人骸骨相撐拄結髮行事君慊慊心意間明  
知邊地苦賤妾何能久自全

輕剝嬌捷似不類建安體裁剖衷  
憑血剝骨摧心遂作中唐鼻祖

徐幹

字偉長北海人為司空軍謀  
祭酒掾屬五官中郎將文學

徐幹詩淺淺生動  
是為詩中小品

詩

室思

人靡不有初想君能終之別來歷年歲舊恩何可期  
重新而忘故君子所猶譏寄身雖在遠豈忘君須臾既厚  
不為薄想君時見思

雜詩

峩峩高山首悠悠萬里道君去日已遠鬱結令人老人  
生一世間忽若暮春草時不可再得何為自愁惱每誦

昔鴻恩賤軀馬足保

浮雲何洋洋願因通我詞飄飄不可寄徒倚徒相思人  
離皆復會君獨無返期自君之出矣明鏡暗不治思君  
如流水何有窮已時

阮瑀

字元瑜陳留人少受學于蔡邕曹操辟為司空軍  
謀祭酒管記室後為倉曹掾屬建安十七年卒

詩

雜詩

臨川多悲風秋日苦清涼客子易為戚感此用哀傷攬

衣起躑躅上觀心與房三星守故次明月未收光雞鳴  
當何時朝晨尚未央還坐長歎息憂憂安可忘

風格標舉

第未得壯

繁欽

字休伯文才機辨少得名於汝穎  
為丞相主簿建安二十三年卒

定情詩

我出東門遊邂逅承清塵思君即幽房侍寢執衣巾時  
無柔中契迫此路側人我既媚君姿君亦悅我顏何以  
致拳拳縮臂雙金環何以致殷勤約指一雙銀何以致

區區耳中雙明珠何以致叩叩香囊繫肘後何以致契  
濶繞腕雙跳脫何以結恩情美玉綴羅纓何以結中心  
素縷連雙鍼何以結相於金薄畫搔頭何以慰別離耳  
後瑋瑁釵何以答歡悅紈素三條裾何以結愁悲白絹  
雙中衣與我期何所乃期東山隅日旰兮不來谷風吹  
我襦遠望無所見涕泣起踟躕與我期何所乃期山南  
陽日中兮不來飄風吹我裳逍遙莫誰覩望君愁我腸  
與我期何所乃期西山側日夕兮不來躑躅長歎息遠

望涼風至俯仰正衣服與我期何所乃期山北岑日暮  
今不來淒風吹我襟望君不能坐悲若愁我心愛身以  
何為惜我華色時中情既款款然後尅密期褰衣躡茂  
草謂君不我欺廁此醜陋質徒倚無所之自傷失所欲  
淚下如連絲

撥艷情之最勝然  
情思搖蕩極矣

古詩鏡卷六

欽定四庫全書

古詩鏡卷七

明 陸時雍 編

魏第四

阮籍

字嗣宗陳留尉氏人司空記室瑀之子容貌瓌傑志氣宏放初辟太尉掾進散騎常侍大將軍司馬

昭欲為其子炎求婚籍乃醉六十日不得言而止後引為從事中郎籍聞步兵厨多美酒遂求為步兵校尉縱酒昏酣遺落世事又對人能為青白眼由是禮法之士深所讐疾大將軍常保持之

嗣宗慎言詩中語都與世遠縫緼情深憂危慮切以此當窮途之哭矣 八十二首俱憂時閔亂無

一念世  
城俗語

詩

詠懷

夜中不能寐起坐彈鳴琴薄帷鑒明月清風吹我襟孤  
鴻號外野翔鳥鳴北林徘徊將何見憂思獨傷心

起何彷徨結何寥落  
詩之致在意象而已

二妃遊江濱逍遙順風翔交甫懷環珮婉孌有芬芳猗  
靡情歡愛千載不相忘傾城迷下蔡容好結中腸感激

生憂思萱草樹蘭房膏沐為誰施其雨怨朝陽如何金  
石交一旦更離傷

不倫不次是煩寃  
語末語大足傷感

嘉樹下成蹊東園桃與李秋風吹飛藿零落從此始繁  
華有憔悴堂上生荆杞驅馬舍之去去上西山趾一身  
不自保何況戀妻子凝霜被野草歲暮亦云已

結句力  
過奔馬

天馬出西北由來從東道春秋非有託富貴馬常保清

露被臯蘭凝霜霑野草朝為美少年夕暮成醜老自非  
王子晉誰能常美好

此言蓋為富貴發也一起托况迴別自非王子晉  
誰能常美好將前意一噴再醒首尾圓緊氣韵流  
動矣

平生少年時輕薄好絃歌西遊咸陽中趙李相經過娛  
樂未終極白日忽蹉跎驅馬復來歸反顧望三河黃金  
百鎰盡資用常苦多北臨太行道失路將如何

詩人寄况惟於慨歎處  
獨深結語撫衷無限

昔聞東陵瓜近在青門外連畛距阡陌子母相鉤帶五色曜朝日嘉賓四面會膏火自煎熬多財為患害布衣可終身寵祿豈足賴

結語警凡警句醒心深言  
悟世是詩人大作用處

炎暑惟茲夏三旬將欲移芳樹垂綠葉青雲自逶迤四時更代謝日月遞參差徘徊空堂上怵怛莫我知願覩卒歡好不見悲別離

灼灼西隤日餘光照我衣迴風吹四壁寒鳥相因依周

周尚銜羽蛩蛩亦念饑如何當路子磬折忘所歸豈為夸  
譽名憔悴使心悲寧與燕雀翔不隨黃鵠飛黃鵠遊四  
海中路將安歸

起語景色慘然

結語披豁磊落

步出上東門北望首陽岑下有采薇士上有嘉樹林良  
辰在何許凝霜霑衣襟寒風振山岡玄雲起重陰鳴鴈  
飛南征鷓鴣發哀音素質由商聲悽愴傷我心

北里多奇舞濮上有微音輕薄閒遊子俯仰乍浮沈捷

徑從狹路僂俛趨荒淫馬見王子喬乘雲翔鄧林獨有  
延年術可以慰我心

獨有延年術可以  
慰我心是煩寃語

湛湛長江水上有楓樹林皋蘭被徑路青驪逝駸駸遠  
望令人悲春氣感我心三楚多秀士朝雲進荒淫朱華  
振芬芳高蔡相追尋一為黃雀哀淚下誰能禁

結語  
騷激

昔日繁華子安陵與龍陽天天桃李花灼灼有輝光悅

澤若九春磬折似秋霜流盼發姿媚言笑吐芬芳攜手  
等歡愛宿昔同衣裳願為雙飛鳥比翼共翱翔丹青著  
明誓永世不相忘

開秋兆涼氣蟋蟀鳴林惟感物懷殷憂悄悄令心悲多  
言焉所告繁辭將訴誰微風吹羅袂明月耀清暉晨雞  
鳴高樹命駕起旋歸

隱隱衷曲如泣如訴固知情深者文明 晨雞鳴  
高樹命駕起旋歸情事何其徬徨去就何其果決

語致  
高迴

昔年十四五志尚好詩書被褐懷珠玉顏閔相與期開  
軒臨四野登高望所思丘墓蔽山岡萬代同一時千秋  
萬歲後榮名安所之乃悟美門子噉噉令自嗤

意致盤礴深穩是漢魏作手 被褐懷珠玉顏閔  
相與期此志殊自不小志之不就而思名名之無  
成而思仙知古  
人善於托言也

徘徊蓬池上還顧望大梁綠水揚洪波曠野莽茫茫走  
獸交橫馳飛鳥相隨翔是時鶉火中日月正相望朔風  
厲嚴寒陰氣下微霜羈旅無儔匹俛仰懷哀傷小人計

其功君子道其常豈惜終憔悴詠言著斯章

末四語肝膽剴然  
知斯人不苟作者

獨坐空堂上誰可與歡者出門臨永路不見行車馬登  
高望九州悠悠分曠野孤鳥西北飛離獸東南下日暮  
思親友晤言用自寫

起語興情慨慨結語寄意殷殷  
如此首尾盤礴自是阮公家數

懸車在西南羲和將欲傾流光耀四海忽忽至夕冥朝  
為咸池暉濛汜受其榮豈知窮達士一死不再生視彼

桃李花誰能久  
熒熒君子在何許  
歎息未合并瞻仰  
景山松可以慰吾情

西方有佳人  
皎若白日光  
被服織羅衣  
左右珮雙璜  
修容耀姿美  
順風振微芳  
登高眺所思  
舉袂當朝陽  
寄顏雲霄間  
揮袖凌虛翔  
飄飄恍惚中  
流眄顧我傍  
悅懌未交接  
晤言用感傷

楊朱泣歧路  
墨子悲染絲  
揖讓長離別  
飄飄難與期  
豈徒燕婉情  
存亡誠有之  
蕭索人所悲  
既覺不可辭  
趙女

媚中山謙柔愈見欺嗟嗟塗上士何用自保持

於心懷寸陰義陽將欲冥揮袂撫長劍仰觀浮雲征雲  
間有玄鶴抗志揚哀聲一飛冲青天曠世不再鳴豈與  
鷓鴣遊連翩戲中庭

揮袂撫長劍仰視浮雲征是壯士剖胸語

夏后乘靈輿夸父為鄧林存亡從變化日月有浮沈鳳  
凰鳴參差伶倫發其音王子好簫管世世相追尋誰言  
不可見青鳥明我心

殷憂令志結，怵惕常若驚。  
逍遙未終晏，朱華忽西傾。  
蟋蟀在戶牖，蟋蟀鳴中庭。  
心腸未相好，誰云亮我情。  
願為雲間鳥，千里一哀鳴。  
三芝延瀛洲，遠遊可長生。

朝登洪坡顛，日夕望西山。  
荆棘被原野，羣鳥飛翩翩。  
鸞鷲時棲宿，性命有自然。  
建木誰能近，射干復嬋娟。  
不見林中葛，延蔓相勾連。

周鄭天下交，街術當三河。  
妖冶間都子，煥燿何芬葩。  
玄髮發朱顏，睇眄有光輝。  
傾城思一顧，遺視來相誇。  
願為

三春遊朝陽忽蹉跎盛衰在須臾離別將如何

若木燿西海扶桑翳瀛洲日月經天塗明暗不相雙窮  
達自有常得失又何求豈效路上童携手共遨遊陰陽  
有變化誰云沈不浮朱鷺躍飛泉夜飛過吳洲俛仰運  
天地再撫四海流繁累名利場駑駿同一軌豈若遺耳  
目升遐去殷憂

俛仰運天地再撫四海流安得此骯髒語斯言豈  
容虛作真有力轉兩儀目營四海意象憤懣之極  
發為橫溢矣劉伶大  
人論二語可以駕之

一日復一夕一夕復一朝顏色改平常精神自捐消胸  
中懷湯火變化故相招萬事無窮極知謀苦不饒但恐  
須臾間魂氣隨風飄終身履薄冰誰知我心焦

壯士何慷慨志欲威八荒驅車遠行役受命念自忘良  
弓挾烏號明甲有精光臨難不顧生身死魂飛揚豈為  
全軀士效命爭戰場忠為百世榮義使令名彰垂聲謝  
後世氣節故有常

臨難不顧生身死魂飛揚豈為全  
軀士效命爭戰場乃知所爭者大

儔物終始殊修短各異方琅玕生高山芝英耀朱堂  
榮桃李花成蹊將天傷焉敢希千術三春表微光自非  
凌風樹憔悴要有常

鸞鳩飛桑榆海鳥運天池豈不識宏大羽翼不相宜招  
搖安可翔不若棲樹枝下集蓬艾間上遊園圃籬但爾  
亦自足用子為追隨

步遊三衢旁惆悵念所思豈為今朝見恍惚誠有之澤  
中生喬松萬世安可期高鳥摩天飛凌雲共遊嬉豈有

孤行士垂涕悲故時

河上有丈人緯蕭弃明珠甘彼藜藿食樂是蓬蒿廬豈  
效續紛子良馬騁輕輿朝生衢路旁夕瘞橫街隅歡笑  
不終晏俛仰復歎歎鑒茲二三者憤懣從此舒

鑒茲二三者憤懣從此舒阮公遺世乃復以  
此為快耶故知是憤世語亦復是警世語

少年學擊刺妙伎過曲城英風截雲霓超世發奇聲揮  
劍臨沙漠飲馬九野垌旗幟何翩翩但聞金鼓鳴軍旅  
令人悲烈烈有哀情念我平常時悔恨從此生

木槿榮丘墓煌煌有光色白日顏林中翩翩零路側蟋蟀吟戶牖蟋蟀鳴荆棘蟬蛸玩三朝采采修羽翼衣裳為誰施俛仰自收拭生命幾何時慷慨各努力

生命幾何時慷慨各努力努力存生  
艱虞力命憂危之衷有此苦語

出門望佳人佳人豈在茲三山招松喬萬世誰與期存亡有長短慷慨將焉知忽忽朝日隕行行將何之不見季秋草摧折在今時

緩緩着詞丁丁着意是漢人詩借景摭情憑胸  
倒聽是魏人詩曲喻旁引離合往復是阮籍詩



古詩鏡卷七

欽定四庫全書

古詩鏡卷八

明 陸時雍 撰

晉第一

詩莫敵於晉色闇而不黏韻沉而不發氣塞而不暢詞重而不流使非前有傅玄後有陶潛則晉可不言

詩矣

張華

字茂先范陽人晉武帝受禪以為黃門侍郎贊伐吳有功封廣武侯遷尚書後晉為侍中中書監盡

忠匡輔加封公元康六年拜司空  
與趙王倫孫秀有隙為倫秀所害

樂府

博陵王宮俠曲二首

俠客樂幽險築室窮山陰燎獵野獸稀施網川無禽歲  
暮饑寒至慷慨頓足吟窮令壯士激安能懷仁心干將  
坐自缺繁弱控餘音耕佃窮淵陂種粟著劔鐔收秋狹  
路間一擊重千金棲遲熊羆穴容與虎豹林身在法令  
外縱逸常不禁

雄兒任氣俠聲益少年場借友行報怨殺人租市旁吳

刀鳴手中利劍嚴秋霜腰間又素戟手持白頭鑲騰超  
如激電迴旋如流光奮擊當手決交屍自縱橫寧為殤  
鬼雄義不入圜墻生從命子遊死聞俠骨香身沒心不  
懲勇氣加四方

張華清緒濯濯第風格不老昔人謂兒女情多  
風雲氣少此言復過死聞俠骨香語足百代

詩

答何劭

吏道何其迫窘然坐自拘纓綈為徽纏文憲焉可踰恬

曠苦不足煩促每有餘良朋貽新詩示我以游娛穆如  
灑清風煥若春華敷自惜同寮寡於今比園廬衰疾近  
辱殆庶幾並懸與散髮重陰下抱杖臨清渠屬耳聽鷺  
鳴流目翫鯈魚從容養餘日取樂於桑榆

吏道何其迫窘然坐自拘清快散  
髮重陰下抱杖臨清渠不乏爽致

情詩

游目四野外逍遙獨延佇蘭蕙緣清渠繁華陰綠渚佳  
人不在茲取此欲誰與巢居知風寒穴處識陰雨不魯

遠別離安知慕儔侶

雜詩

晷度隨天運四時互相承東壁正昏中涸陰寒節升繁  
霜降當夕悲風中夜興朱火青無光蘭膏坐自凝重衾  
無煖氣挾纒如懷冰伏枕終遙夕寤言莫予應永思慮  
崇昔慨然獨拊膺

朱火青無光蘭膏

坐自凝語氣錚錚

擬古

松生壠坂上百尺下無枝東南望河尾西北隱崑崖剛  
風振山籟朋鳥夜驚離悲涼貫年節葱翠恒若斯安得  
草木心不怨寒暑移

末後二語

古意妙言

傳玄

字休奕北地泥陽人博學善屬文舉秀才晉王時  
為常侍及受禪進爵為子武帝初置諫官以玄為  
之遷侍中轉司隸校尉免官

卒於家追封清泉侯謚曰剛

古貌綺心微情遠境漢後未覩其儔樂府  
淋漓排蕩位置三曹材情妙麗似過之矣

樂府

短歌行

長安高城層樓亭亭干雲四起上貫天庭蜉蝣何整行  
如軍征蟋蟀何感中夜哀鳴虬蜉愉樂粲粲其榮寤寐  
念之誰知我情昔君視我如掌上珠何意一朝棄我溝  
渠昔君與我如影如形何意一去心如流星昔君與我  
兩心相結何意今日忽然兩絕

蜉蝣何整行如軍征蟋蟀何感中夜悲鳴虬蜉愉  
樂粲粲其榮寤寐念之誰知我情一似驚惶一似  
慨傷情以物  
章初無可擬

惟漢行

危哉鴻門會沛公幾不還輕裝入人軍投身湯火間兩  
雄不俱立亞父見此權項莊奮劍起白刃何翩翩伯身  
雖為蔽事促不及旋張良惛坐側高祖變龍顏賴得樊  
將軍虎叱項王前嗔目駭三軍磨牙咀豚肩空厄讓霸  
主臨急吐竒言威凌萬乘主指顧回泰山神龍困鼎鑊  
非噲豈得全狗屠登上將功業信不原健兒實可慕腐  
儒安足歎

氣格渾成與曹子  
建怨歌行爭勝

豔歌行

日出東南隅照我秦氏樓秦氏有好女自字為羅敷首  
戴金翠飾耳綴明月珠白素為下裾丹霞為上襦一顧  
傾朝市再顧國為虛問女居安在堂在城南居青樓臨  
大巷幽門結重樞使君自南來駟馬立踟躕遣吏謝賢  
女豈可同行車斯女長跪對使君言何殊使君自有婦  
賤妾有鄙夫天地正厥位願君改其圖

豫章行苦相篇

苦相身為女卑陋難再陳男兒當門戶墮地自生神  
雄心志四海萬里望風塵女育無欣愛不為家所珍  
長大逃深屋藏頭羞見人垂淚適他鄉忽如雨絕雲  
低頭和顏色素齒結朱唇跪拜無復數婢妾如嚴  
賓情合同雲漢葵藿仰陽春心乖甚水火百惡集  
其身玉顏隨年變丈夫多好新昔為形與影今為  
胡與秦胡秦時相見一絕踰參辰

漢情魏貌絕不  
類晉人所為

秋蘭篇

秋蘭蔭玉池池水清且芳芙蓉隨風發中有雙鴛鴦雙  
魚自踴躍兩鳥時迴翔君其歷九秋與妾同衣裳

氣道

飛塵篇

飛塵穢清流朝雲蔽日光秋蘭豈不芬鮑肆亂其芳河  
決潰金堤一手不能障

後二語

特舉

飲馬長城窟行

青青河邊草悠悠萬里道草生在春時遠道還有期春  
至草不生期盡歎無聲感物懷思心夢想發中情夢君  
如鴛鴦比翼雲間翔既覺寂無見曠如參與商夢君結  
同心比翼游北林既覺寂無見曠如商與參河洛自用  
固不如中岳安回流不及返浮雲往自還悲風動思心  
悠悠誰知者懸景無停居忽如馳駟馬傾耳懷音響轉

目淚雙墮生存無會期要君黃泉下

西漢情曲鄴中語致所以華而婉  
魏人徑情直往無此委折稠疊

### 放歌行

靈龜有枯甲神龍有腐鱗人無千歲壽存質空相因朝  
露尚移景促哉水上塵丘塚如履綦不識故與新高樹  
來悲風松柏垂威神曠野何蕭條顧望無生人但見狐  
狸迹虎豹自成羣孤雛攀樹鳴離鳥何續紛愁子多哀  
心塞耳不忍聞長嘯淚雨下太息氣成雲

語氣凝重品格在漢魏之間大抵托基既高則發言自遠平胷直厲自不落凡近規摹矣

豔歌行有女篇

有女懷芬芳媿媿步東廂蛾眉分翠羽明眸發清揚丹  
唇翳皓齒秀色若珪璋巧笑露懽靨衆媚不可詳令儀  
希世出無乃古毛嬙頭安金步搖耳繫明月璫珠環約  
素腕翠羽垂鮮光文袍綴藻黼玉體映羅裳容華既已  
豔志節擬秋霜徽音冠青雲聲響流四方妙哉美媛德  
宜配侯與王靈應萬世合日月時相望媒氏陳束帛羔

鴈鳴前堂百兩盈  
中路起若鸞鳳翔  
凡夫徒踴躍望絕  
殊參商

視曹子建美女篇相似  
格聳氣亮似復過之

明月篇

皎皎明月光灼灼  
朝日暉昔為春蠶絲  
今為秋女衣丹唇  
列素齒翠彩發蛾  
眉嬌子多好言歡  
合易為姿玉顏  
盛有時秀色隨年  
衰常恐新間舊變  
故興細微浮萍本  
無根非水將何依  
憂喜更相接樂極  
還自悲

董逃行歷九秋篇十二首

歷九秋兮三春遺貴客兮遠賓顧多君心所親乃命妙  
妓才人炳若日月星辰

序金罍兮玉觴賓主遞起鴈行杯若飛電絕光交觴接  
巵結裳慷慨歡笑萬方

奏新詩兮夫君爛然虎變龍文渾如天地未分齊謳楚  
舞紛紛歌聲上激青雲

窮八音兮異倫竒聲靡靡每新微披素齒丹唇逸響飛

薄梁塵精爽眇眇入神

坐咸醉兮沾歡引樽促席臨軒進爵獻壽翻翻千秋要  
君一言願愛不移若山

君恩愛兮不竭譬若朝日夕月此景萬里不絕長保初  
醮髮結何憂坐成胡越

攜弱手兮金環上遊飛閣雲間穆若鴛鳳雙鸞還幸蘭  
芳自安娛心樂意難原

樂既極兮多懷盛時忽逝若頽寒暑革御景迴榮華隨

風飄摧感物動心增哀

妾受命兮孤虛男兒墮地稱珠女弱雖存若無骨肉至  
親更疏奉事他人託軀

君如影兮隨形賤妾如水浮萍明月不能常盈誰能無  
根保榮良時冉冉代征

顧繡領兮含暉皎若迴光則微朱華忽爾漸衰影欲舍  
形高飛誰言往思可追

薺與麥兮夏零蘭桂踐霜逾馨祿命懸天難明妾心結

意丹青何憂君心中傾

結撰精與描情寫色眇眇  
入神當屬西漢第一妙手

吳楚歌

燕人美兮趙女佳其室則邇兮限層崖雲為車兮風為  
馬玉在山兮蘭在野雲無期兮風有止思多端兮誰能

理

鴻鴈生塞北行

魏武帝却東西門行曰鴻  
鴈生塞北乃在無人鄉

鳳凰遠生海西及時崑山岡五德存羽儀和鳴定宮商  
百鳥並侍左右鼓翼騰華光上熙遊雲日間千歲時來  
翔孰若彼龍與龜曳尾泥中藏非雲雨則不升冬伏春  
迺驥退哀此秋蘭草根絕隨化揚靈氣一何憂美萬里  
馳芬芳常恐物微易歇一朝見棄忘

最饒  
遠韻

白楊行

青雲固非青當雲奈白雲驥從西北馳來吾何憶驥來

對我悲鳴舉頭氣凌青雲當奈此驥正龍形踈足蹉跎  
長坡下蹇驢慊慊敢與我爭馳躑躅鹽車之中流汗兩  
耳盡下垂雖懷千里之逸志當時一得施白雲影影舍  
我高翔青雲徘徊戢我愁啼上眄增崖下臨清池日欲  
西移既來歸君君不一顧仰天太息當用生為青雲乎  
飛時悲當奈何耶青雲飛乎

酣恣  
馳驟

秦女休行

龐

一作秦

氏有烈婦義聲馳雍涼父母家有重怨仇人暴

且疆雖有男兄弟志弱不能當烈女當此痛丹心為寸  
傷外若無意者內潛思無方白日入都市怨家如平常  
匿劍藏白刃一奮尋身僵身首為之異處仗尸列肆旁  
肉與土合成泥灑血濺飛梁猛氣上干雲覓仇黨失守  
為披攘一市稱烈義觀者收淚竝慨忼百男何當益不  
如一女良烈女直造縣門云父不幸遭禍殃今仇身以  
分裂雖死情益揚殺人當伏法義不苟活隳舊章縣令

解印綬令我傷心不忍聽刑部垂頭塞甘令我吏舉不能成烈著希代之績義立無窮之名夫家同受其祚子子孫孫咸享其榮今我作歌詠高風激揚壯發悲且清

語語生色叙贊  
兩工式得其體

### 雲中白子高行

陵陽子來明意欲作天與仙人遊超登元氣攀日月遂造天門將上謁閭闔闔見紫微絳闕紫宮崔嵬高殿差峩雙闕萬丈玉樹羅童女掣電策童兒挽雷車雲漢隨

天流浩浩如江河因王長公謁上皇鈞天樂作不可詳  
龍仙神仙教我靈祕八風子儀與遊我祥我心何戚戚  
思故鄉俯看故鄉二儀設張樂哉二儀日月運移地東  
南傾天西北馳鶴五氣所補鼇四足所支齊駕飛龍駿  
赤螭逍遙五岳間東西馳長與天地並復何為復何為

直是登太極俯兩儀下視一切蠢蠢眇四海而  
芥五岳空中布象神色淋漓乃氣韻亦復高古

### 西長安行

所思兮何在乃在西長安何用存問妾香橙雙珠環何

用重存問羽爵翠琅玕今我今問君更有今異心香亦  
不可燒環亦不可沈香燒日有歇環沈日自深

車遙遙篇

車遙遙兮馬洋洋追思君兮不可忘君安遊兮西入秦  
願為影兮隨君身君在陰兮君不見君依光兮妾所願

昔思君

昔君與我兮形影潛結今君與我兮雲飛雨絕昔君與  
我兮音響相和今君與我兮落葉去柯昔君與我兮金

石無虧今君與我兮星滅光離

詩

雜詩

志士惜日短愁人知夜長攝衣步前庭仰觀南鴈翔  
玄景隨形運流響歸空房清風何飄颻微月出西方  
繁星依青天列宿自成行蟬鳴高樹間野鳥號東廂  
纖雲時髣髴渥露沾我裳良時無停景北斗忽低昂  
常恐寒節至凝氣結為霜落葉隨風摧一絕如流光

風味不減魏文但魏文氣  
韻流美傳玄以格力當之

古詩

東方大明星光景照千里少年舍家遊思心晝夜起

雜言

雷隱隱感妾心傾耳清聽非車音

啄木

啄木高翔鳴喞喞飄搖林薄著桑槐獾緣樹間啄如錘  
嚶啞嚶啞聲正悲專為萬物作倡俳當此之時樂不可

晉之傅玄梁之庾肩吾隋  
之張正見聲色臭味俱全

附和秋胡行情以感興為端而以風味為美詠事賦  
情得其大意而已纖悉詳密非所尚也傅玄和秋胡  
行人言生日短愁者苦夜長補却採桑起意正是不  
必且愁苦夜長於秋胡婦何當也精誠馳萬里既至  
兩相忘復補相誘起意無渡裝橋反為多事格何其  
晚憂來猶四海易感難可防語亦拙末二語商畧得  
妥 秋胡納令室三日宦他鄉皎皎潔婦姿冷冷守  
空房燕婉不終夕別如參與商憂來猶四海易感難  
可防人言生日短愁者苦夜長百草揚春華攘脫採桑  
桑素手尋繁枝落葉不盈筐羅衣翳玉體四日流采  
章君子倦仕歸車馬如龍驟精誠馳萬里既至兩相  
忘行人悅令顏借息此樹傍誘以逢卿喻遂下黃金

裴烈烈貞女念言辭厲秋霜長驅及居室奉金升北  
堂毋立呼婦來歡情樂未央秋胡見此婦慟然懷探  
湯負心豈不慙永誓非所望清濁必異源鳧鳳不並  
翔引身赴長流果哉潔婦腸彼夫既不淑此婦亦太  
剛

棗據

字道彥潁川長社人善文辭弱冠辟大將軍府出  
為山陽令遷尚書郎賈充伐吳請為從事中郎軍  
還徙黃門侍郎冀州

刺史太子中庶子卒

詩

雜詩

吳寇未殄滅亂象侵邊疆天子命上宰作蕃於漢陽開

國建元士王帛聘賢良子非荆山璞謬登和氏塲羊質  
服虎文燕翼假鳳翔既懼非所任怨彼南路長千里既  
悠邈路次限關梁僕夫罷遠涉車馬困山岡深谷下無  
底高巖暨穹蒼曲草停滋潤霧露沾衣裳玄林結陰氣  
不風自寒涼顧瞻情感切惻愴心哀傷士生則懸弧有  
事在四方安得恒逍遙端坐守閨房引義割外情內感  
實難忘

平襟直寫  
亦得寡病

何劭

字敬祖陳國陽夏人司空曾之子博學善屬文武帝踐阼以為散騎常侍永康初遷司徒趙王倫篡

位以為太宰永寧元年薨

襲封朗陵郡公謚曰康

詩

雜詩

秋風乘夕起明月照高樹  
閒房來清氣廣庭發暉素  
靜寂愴然歎惆悵忽遊顧  
仰視垣上草俯察階下露  
心虛體自輕飄飄若仙步  
瞻彼陵上柏想與神人遇  
道深難可期精微非所慕  
勤思終遙夕永言寫情慮

附東哲補亡六詩雅貌淺衷祇是晉語南陔孝子  
相戒以養也循彼南陔言采其蘭春戀庭闈心不  
違安彼居之子罔或游盤馨爾夕膳潔爾晨食猶彼  
南陔厥草油油彼居之子色思其柔春戀庭闈心不  
違留馨爾夕膳潔爾晨蓋有獺有獺在河之涘凌波  
赴汨噬魴捕鯉噉噉林鳥受哺于子養隆敬薄惟禽  
之似昂增爾度以介丕祉由庚萬物得由其道也  
蕩蕩夷庚物則由之蠢蠢庶類王亦柔之道之既  
由化之既柔木以秋零草以春抽獸在在草魚躍順  
流四時遞謝八風代扇纖阿窈窕星變其躔五緯不  
愆六氣無易愔愔  
我王紹文之跡

古詩鏡卷八

欽定四庫全書

古詩鏡卷九

明 陸時雍 撰

晉第二

陸機

字士衡吳郡人大司馬抗之子也少有奇才領父

太子洗馬著作郎出補吳王郎中令入為尚書郎趙  
王倫輔政引為參軍大安初成都王穎等起兵討長

沙王又假機後將軍河北大  
都督因戰敗績為穎所害

孫綽云陸深而蕪潘淺而淨詩緣情而綺  
靡病所流於蕪也篇中累句皆綺靡所為

樂府

短歌行

置酒高堂悲歌臨觴人壽幾何逝如朝霜時無重至華  
不再揚蘋以春暉蘭以秋芳來日苦短去日苦長今我  
不樂蟋蟀在房樂以會興悲以別章豈曰無感憂為子  
忘我酒既旨我有既臧短歌有詠長夜無荒

意象淺促更無餘地曹氏  
父子只意有餘而言不盡

豫章行

汎舟清川渚遙望高山陰川陸殊塗軌懿親將遠尋三  
荆歡同株四鳥悲異林樂會良自古悼別豈獨今寄世  
將幾何日昃無停陰前路既已多後塗隨年侵促促薄  
暮景疊疊鮮克禁曷為復以茲曾是懷苦心遠節嬰物  
淺近情能不深行矣保嘉福景絕繼以音

陸機詩可喜處有清俊之氣可憎處在縛繡之辭  
豫章行長安有狹邪行塘上行飲馬長城窟行諸  
篇絕少  
詞累

長安有狹邪行

伊洛有岐路岐路交朱輪輕蓋承華景騰步躡飛塵鳴  
玉豈樸儒憑軾皆俊民烈心厲勁秋麗服鮮芳春余本  
倦遊客豪彥多舊親傾蓋承芳訊欲鳴當及晨守一不  
足矜岐路良可遵規行無曠迹矩步豈逮人投足緒已  
爾四時不必循將遂殊塗軌要子同歸津

四時不必循  
一語亦拙

塘上行

江離生幽渚微芳不足宣被蒙風雲會移居華池邊發

藻玉臺下垂影滄浪泉雷潤既已渥結根與且堅四節  
逝不處繁華難久鮮淑氣與時殞餘芳隨風捐天道有  
遷易人理無常全男懼智傾愚女愛衰避妍不惜微軀  
退但懼蒼蠅前願君廣末光照妾薄暮年

飲馬長城窟行

驅馬陟陰山山高馬不前往問陰山候勁虜在燕然戎  
車無停軌旌旆屢徂遷仰憑積雪巖俯涉堅冰川冬來  
秋未反去家邈以絲獫狁亮未夷征人豈徒旋末德爭

先鳴凶器無兩全師克薄賞行軍沒微軀捐將遵甘陳  
迹收功單于旃振旅勞歸士受爵藁街傳

門有車馬客行

門有車馬客駕言發故鄉念君久不歸濡跡涉江湘投  
袂赴門塗攬衣不及裳拊膺攜客泣掩淚叙溫涼借問  
邦族間惻愴論存亡親友多零落舊齒昏彫喪市朝忽  
遷易城闕或丘荒墳壟日月多松栢鬱芒芒天道信崇  
替人生安得長慷慨惟平生俛仰獨悲傷

驚心事刺意語所  
少者氣韻流動

君子有所思行

命駕登北山延佇望城郭塵里一何盛街巷紛漠漠甲  
第崇高閨洞房結阿閣曲池何湛湛清川帶華薄邃宇  
列綺窻蘭室接羅幕淑貌色斯升哀音承顏作人生誠  
行邁容華隨年落善哉膏粱士營生與且博宴安消靈  
根鳩毒不可恪無以肉食資取笑葵與藿

猛虎行

渴不飲盜泉水熱不息惡木陰惡木豈無枝志士多苦  
心整駕肅時命杖策將遠尋饑食猛虎窟寒棲野雀林  
日歸功未建時往歲載陰崇雲臨岸駭鳴條隨風吟靜  
言幽谷底長嘯高山岑急弦無懦響亮節難為音人生  
誠未易曷云開此衿眷我耿介懷俯仰愧古今

崇雲臨岸駭鳴條隨風吟此成何語饑  
食猛虎窟寒棲野雀林亦衿作太過

### 悲哉行

游客芳春林春芳傷客心和風飛清響鮮雲垂薄陰蕙

草饒淑氣時鳥多好音翩翩鳴鳩羽啾啾倉庚音幽闌  
盈通谷長秀被高岑女蘿亦有託蔓葛亦有尋傷哉容  
遊士憂思一何深目感隨氣草耳悲詠時禽寤寐多遠  
念緬然若飛沈願託歸風響寄言遺所欽

聞人清林有驚心鳥困多奪目花其詩已近律矣  
猶病俚氣士衡目感隨氣草耳悲詠時禽古體中  
更傷雅道凡妝點造作非雅即  
俚縱得佳句總不登大雅之堂矣

詩

贈尚書郎顧彥先

大火貞朱光積陽熙自南望舒離金虎屏翳吐重陰淒  
風迂時序苦雨遂成霖朝遊忘輕扇夕息憶重衾感物  
百憂生纏綿自相尋與子隔蕭牆蕭牆阻且深形影曠  
不接所託聲與音音聲日夜闊何用慰吾心

朝遊忘輕扇夕息  
憶重衾苦拘而陋

贈從兄車騎

孤獸思故藪離鳥悲舊林翩翩游宦子辛苦誰為心髣  
髴谷水陽婉孌崑山陰營魄懷茲土精爽若飛沈寤寐

靡安豫願言思所欽感彼歸途艱使我怨慕深安得忘  
歸草言樹背與襟斯言豈虛作思鳥有悲音

為顧彥先贈婦

東南有思婦長歎充幽閨借問歎何為佳人眇天末遊  
宦久不歸山川修且闊形影參商乖音息曠不達離合  
非有常譬言彼絃與箏願保金石軀慰妾長饑渴

赴洛道中作

遠遊越山川山川修且廣振策陟崇丘安轡遵平莽夕

息抱影寐朝徂銜思往頓轡倚高巖側聽悲風響清露  
墜素輝明月一何朗撫枕不能寐振衣獨長想

末數語清

湛如溜

### 擬明月何皎皎

安寢北堂上明月入我牖照之有餘輝攬之不盈手涼  
風繞曲房寒蟬鳴高柳踟躕感節物我行永已久遊宦  
會無我離思難常守

照之有餘輝攬之不盈手老而潔  
是長篇中短賦末二語仿騷漢人

招隱詩

明發心不夷振衣聊躑躅躑躅欲安之幽人在浚谷朝  
采南澗藻夕息西山足輕條象雲構密葉承翠幄激楚  
竹蘭林回芳薄秀木山溜何冷冷飛泉漱鳴玉哀音附  
靈波頽響赴曾曲至樂非有假安事澆淳樸富貴苟難  
圖稅駕從所欲

一起韻致猶夷 費許點飾獨立至尊  
輸他本相兒緣飾愈巧則聲格愈卑

附挽歌三首長哭大慟然而不悲無情故也更病太  
甚凡過飾則損真好盡則傷雅故道貴中和詩歸風

雅卜擇考休貞嘉命咸在茲夙駕警徒御結轡頓  
重基龍旒被廣柳前驅矯輕旗殯宮何嘈嘈哀響涕  
中間中聞且勿誰聽我薤露詩死生各異倫祖載當  
有時舍爵兩楹位啓殯近靈輜欲錢鶴莫舉出宿歸  
無期惟衽曠遺影棟宇與子辭周親咸犇湊友朋自  
遠來翼翼飛輕軒駸駸策素騏按轡遵長薄送子長夜  
臺呼子子不聞泣子子不知歎息重楸側念我疇昔  
時三秋猶足收萬世安可思殉沒身易亡殺子非所  
能舍言言哽咽揮涕涕流離流離親友思惆悵神  
不泰素驂佇輜軒玄駟驚飛蓋哀鳴興殯宮迴遲悲  
野外魂與寂無響但見冠與帶備物象平生長旌誰  
為旆悲風殺行軌傾雲結流靄振策指靈丘駕言從  
此逝重阜何雀鬼玄虛竄其間磅礴立四極穹隆  
放蒼天側聽陰溝涌卧觀天井懸瘡膏何寥廓大暮  
安可晨人往有返歲我行無歸年昔居四民宅今託  
萬鬼隣昔為七尺軀今成灰與塵金玉素所佩鴻毛

今不振豐肌饗螻蟻妍姿永夷泯壽堂延魑魅虛無  
白相賓螻蟻爾何怨魑魅我何親拊心痛荼毒永歎

莫為  
陳

陸雲

字士龍少與兄機齊名吳平入洛刺史周浚召為  
從事公府掾太子舍人出補浚儀令後拜吳王宴  
郎中令成都王頽表為清河內史  
屢以正言忤旨機敗并為頽所害

詩

答張士然

行邁越長川飄颻冒風塵通波激枉渚悲風薄丘榛修  
路無窮迹井邑自相循百城各異俗千室非良鄰歡舊

難假合風土豈虛親感念桑梓域髣髴眼中人靡靡日  
夜遠眷眷懷苦辛

士龍苦無材思名以兄傳  
惟荅張士然庶為可詠

為顧彥先贈婦往返

悠悠君行邁  
焚焚妾獨止  
山河安可踰  
水路隔萬里  
京室多妖冶  
粲粲都人子  
雅步擢纖腰  
巧言發皓齒  
佳麗良可美  
衰賤馬足紀  
遠蒙眷顧言  
銜恩非望始

浮海難為水  
遊林難為觀  
容色貴及時  
朝華忌日晏  
皎

皎彼妹子灼灼懷春粲西城善雅舞總章鏡清彈鳴簧  
發丹唇朱絃繞素腕輕裾猶電揮雙袂如霧散華容溢  
藻幄哀響入雲漢知音世所希非君誰能讚棄置北辰  
星問此玄龍煥時暮復何言華落理必賤

潘岳

字安仁 滎陽中牟人 美姿儀 少以才穎發名 善屬文 清綺絕世 舉秀才為郎 遷河陽懷二縣令 入補

尚書郎 累遷給事黃門侍郎 素與孫秀有隙 及趙王倫輔政 秀遂誣岳與石崇為亂 誅之

詩

河陽縣作

微身輕蟬翼弱冠忝嘉招在疚妨賢路再升上宰朝猥  
荷公叔舉連陪厠王寮長嘯歸東山擁耒耨時苗幽谷  
茂織葛峻巖敷榮條落英隕林趾飛莖秀陵喬卑高亦  
何常升降在一朝徒恨良時泰小人道遂消譬如野田  
蓬幹流隨風飄昔倦都邑遊今掌河朔徭登城眷南顧  
凱風揚微綃洪流何浩蕩修芒鬱岑堯誰謂晉京遠室  
邇身實遼誰謂邑宰輕令名患不幼人生天地間百年  
孰能要歛如敲石火瞥若截道颺齊都無遺聲桐鄉有

餘謠福謙在純約害盈由矜驕雖無君人德視民庶不  
恍

在懷縣作

春秋代遷逝四運紛可喜寵辱易不驚戀本難為思我  
來冰未泮時暑忽隆熾感此還期淹歎彼年往駛登城  
望郊向游目歷朝寺小國寡民務終日寂無事白水過  
庭激綠槐夾門植信美非吾土祇覺懷歸志眷然顧羣  
洛山川邈離異願言旋舊鄉畏此簡書忌祇奉社稷守

恪居處職司

內顧詩

靜居懷所歡登城望四澤  
春草鬱青青桑柘何奕奕  
芳林振朱榮淥水激素石  
初征冰未泮忽焉袵絺綌  
漫漫三千里迢迢遠行客  
馳情戀朱顏寸陰過盈尺  
夜愁極清晨朝悲終日夕  
山川信悠永願言良弗獲  
引領訊歸期沈思不可釋

潘岳詩數布具饒蘊藉  
絕少謂詩家之口給可

左思

字太冲齊國臨淄人也徵為秘書郎齊王同命為紀室辭疾不就以疾終

左思氣粗每發一言努目掀肩頭顱俱動時覺村氣撲人凡豪則易粗豪而卓乃真豪矣

詩

詠史

鬱鬱澗底松離離山上苗以彼徑寸莖蔭此百尺條世  
胃躡高位英俊沈下僚地勢使之然由來非一朝金張  
藉舊業七葉珥漢貂馮公豈不偉白首不見招

皓天舒白日靈景耀神州列宅紫宮裏飛宇若雲浮峨

峨高門內藹藹皆王侯自非攀龍客何為歛來遊被褐  
出閭闔高步追許由振衣千仞岡濯足萬里流

振衣千仞岡濯足萬里流  
流名語初獲雄視百世

招隱

杖策招隱士荒塗橫古今巖穴無結構丘中有鳴琴白  
雲停陰岡丹葩曜陽林石泉漱瓊瑤纖鱗或浮沉非必  
絲與竹山水有清音何事待嘯歌灌木自悲吟秋菊兼  
餽糧幽蘭間重襟躊躇足力煩聊欲投吾簪

招隱何多飾也抑更矜矜然古人於此處之若故  
道之若素絕不妝扮賣弄非必絲與竹山水有清  
音何事待嘯歌灌木自悲吟秋菊兼餽程幽蘭間  
重襟欲高得誇欲雅得俚欲清遠得塵近陶潛乞  
食不見可早左思招隱不  
見可貴以此叅詩之品矣

張載

字孟陽安平人也博學有文章起家佐著作郎累  
遷弘農太守長沙王又請為記室督拜中書侍郎  
復領著作  
稱疾歸卒

詩

七哀詩二首

北邙何壘壘高陵有四五借問誰家墳皆云漢世主恭

文遙相望原陵鬱膻膻季世喪亂起賊盜如豺虎毀壞  
過一抔便房啓幽戶珠柙離玉體珍寶見剽虜園寢化  
為墟周墉無遺堵蒙龍荆棘生蹊逕登童豎狐兔窟其  
中蕪穢不復掃顏龍並壑發萌隸營農圃昔為萬乘君  
今為丘中土感彼雍門言悽愴哀今古

秋風吐商氣蕭瑟掃前林陽烏收和響寒蟬無餘音白  
露中夜結木落柯條森朱光馳北陸浮景忽西沈顧望  
無所見唯覩松栢陰肅肅高桐枝翩翩棲孤禽仰聽離

鴻鳴俯聞蜻蛚吟哀人易感傷觸物增悲心丘隴日已  
遠纏綿彌思深愛來令髮白誰云愁可任裴徊向長風  
淚下沾衣襟

語不矜飾修琢得佳不令人厭凡詩太虛則無味  
太實則無色故實中之神虛中之骨作者所必務  
也 第二首入雜詩則可  
若同前題未見哀情之甚

張協 字景陽與兄載齊名辟公府掾轉秘書郎累遷中  
書侍郎轉河間內史時天下已亂遂屏居草澤以

屬詠自娛  
終於家

詩

雜詩

秋夜涼風起清氣蕩暄濁蜻蛚吟階下飛蛾拂明燭君  
子從遠役佳人守梵獨離居幾何時鑽燧忽改木房櫳  
無行跡庭草萋以綠青苔依空墻蜘蛛網四屋感物多  
所懷沈憂結心曲

大火流坤維白日馳西陸浮陽映翠林迴飈扇綠竹飛  
雨灑朝蘭輕露棲叢菊龍蟄暄氣凝天高萬物肅弱條  
不重結芳蕤豈再馥人生瀛海內忽如鳥過目川上之

歎逝前修以自勗

朝霞迎白日丹氣臨暘谷翳翳結繁雲森森散雨足輕  
風推勁草凝霜竦高木密葉日夜疎叢林森如束疇昔  
歎時遲晚節悲年促歲暮懷百憂將從季主卜

此鄉非吾地此郭非吾城羈旅無定心翩翩如懸旌出  
覩軍馬陣入聞鞞鼓聲常懼羽檄飛神武一朝征長鉞  
鳴鞘中烽火列邊亭捨我衡門衣更被縵胡纓疇昔懷  
微志惟慕竊所經何必操干戈堂上有奇兵折衝樽俎

間制勝在兩楹巧遲不足稱拙速乃垂名

張協雜詩工為擬議然無迹體遠情如阮籍一二語便開蹕無根矣重基足擬志迴淵可比心的是

語音

王讚

字正長義陽人也博學有俊才辟司空掾歷散騎侍郎卒

詩

雜詩

朔風動秋草邊馬有歸心胡寧久分析靡靡忽至今王  
事離我志殊隔過商參昔往鶴鶴鳴今來蟋蟀吟人情

懷舊鄉客鳥思故林師涓久不奏誰能宣我心

朔風動秋草邊馬有歸  
心氣韻生動然是晉語

孫楚

字子荆太原中都人少負才氣多陵傲初為石苞  
驃騎參軍初至長揖曰天子命我參卿軍事因此

構隙涇廢積年後扶風王駿起為征西參  
軍遷衛軍司馬惠帝初拜馮翊太守卒

詩

征西官屬送於陟陽候作詩

晨風飄岐路零雨被秋草傾城遠追送餞我千里道三  
命皆有極咄嗟安可保莫大於殤子彭聃猶為夭吉凶

如糾纏憂喜相紛擾天地為我壚萬物一何小達人垂  
大觀誠此苦不早乖離即長衢惆悵盈懷抱孰能察其  
心鑒之以蒼昊齊契在今朝守之與偕老

晨風飄岐路零雨被秋草  
格力挺拔似魏人語致

石崇

字季倫渤海人年二十餘為城陽太守伐吳有功  
封安陽鄉侯累遷侍中出為南中郎將荊州刺史  
領南蠻校尉致富不貲後拜太僕衛尉有愛妓綠  
珠孫秀使人求之不得遂勸趙王倫誅族其家

樂府

王明君辭并序

王明君者本是王昭君以觸文帝諱改之匈奴感請  
婚於漢元帝以後宮良家子昭君配焉昔公主嫁烏  
孫令琵琶馬上作樂以慰其道路之思其送昭君亦  
必爾也其造新曲多哀怨之聲故叙之於紙云爾

我本漢家子將適單于庭辭訣未及終前騎已抗旌僕  
御涕流離轅馬悲且鳴哀鬱傷五內泣淚沾朱纓行行  
日已遠遂造匈奴城延我於穹廬加我閼氏名殊類非  
所安雖貴非所榮父子見陵辱對之慙且驚殺身良不

易默默以苟生苟生亦何聊積思常憤盈願假飛鴻翼  
乘之以遐征飛鴻不我顧佇立以屏營昔為匣中玉今  
為糞上英朝華不足歡甘與秋草并傳語後世人遠嫁  
難為情

畧得梗概至於關山日暮瓊幕秋風幽哀隱緒須  
今琵琶自語富家子日擁千金姬驕語詩賦當自  
寫之不及

綠珠

石崇妾

詩

懊儂歌

古今樂錄曰懊儂歌晉綠珠所作唯絲布澁難縫一曲而已

絲布澁難縫令儂十指穿黃牛細犢車遊戲出孟津

綽有

古意

附翔風怨詩失愛在蛾眉一語亦善怨  
春華誰不美卒傷秋落時突烟還自依  
鄙退豈所期桂芳徒自蠹失愛在蛾眉坐見芳時歇  
憔悴空自嗤拾遺記曰石季倫有愛婢曰翔風魏末於胡中得之  
年十五無有比其容貌最以文辭擅愛年三十抄年者爭嫉之崇  
退翔風為房老仗主羣少乃懷怨而作詩

郭璞

字景純河東聞喜人文章冠一時尤妙於陰陽筭歷卜筮之術王導引為參軍補著作佐郎遷尚書

郎以母憂去王敦起為記室參軍敦既謀逆使筭璞曰無成壽且不久敦大怒即收斬之及敦平追贈弘

守農太

詩

遊仙詩

翡翠戲蘭苔容色更相鮮綠蘿結高林蒙籠蓋一山中  
有冥寂士靜嘯撫清絃放情凌霄外嚼藥挹飛泉赤松  
臨上游駕鴻乘紫煙左把浮丘袖右拍洪崖肩借問蟪

蟒輩寧知龜鶴年

雜縣

音

寓魯門風暖將為災吞舟涌海底高浪駕蓬萊

神仙排雲出但見金銀臺陵陽挹丹溜容成揮玉杯  
姮娥揚妙音洪崖領其頤升降隨長煙飄飄戲九垓  
竒齡邁五龍千歲方嬰孩燕昭無靈氣漢武非仙才

雖有清幹若無靈襟當晉詩蕪穢之時稍出幹  
裁便來世賞其言皆憂世語名為遊仙蓋托也

孫綽

字興公統之弟博學善屬文為著作佐  
郎累遷散騎常侍轉廷尉卿領著作卒

詩

情人碧玉歌二首

碧玉歌一名千金意晉孫綽所作樂府詩集云宋汝南王作

碧玉小家女不敢攀貴德感郎千金意慙無傾城色  
碧玉破瓜時郎為情顛倒感君不羞赧迴身就郎抱

古詩鏡卷九